



撫雲集序

家姪孫木庵為近代詩人之冠其集曰撫雲叢會詩為之序夫古人之詩有無序者其詩不待序而傳也左思三都賦成自以其時名不甚著故乞序於皇甫氏木庵業以詩遊公卿而王長其間無序可也蓋序者叙所以作之旨也一人叙之或義有未盡又一人續叙之是為後序多為之序重複其詞非體也木庵以詩遊公卿先我作者多矣予又不序可也夫是以許為之序而又三年淹也乃木庵書來曰惟先生知吾學所從來更不乞第二人作序責舊許甚牢予惟乃祖嗣隆先兄挈予同

學於顧仲恭先生指示讀書之法先經後史下逮諸子
百家源流井井當是時木庵坐祖膝上挽鬚問字比入
外塾則已闡發指示語說詩解頤論易折角矣忽忽四
十餘年乃祖棄予輩游岱木庵弱冠走京師辟為王官
師傅公卿延位上座才益奇名日益噪大吏出使海外
請與偕往颿風箭激漫瀾粘天常一日蹕數千里魚龍
之所撞突隲淑之所灤回顧益自喜以謂軟紅塵全須
此一番擺蕩也又同朝貴使塞外絕域盾背磨墨日次
記其游歷間關多博望元奘耶律楚材所未到而題詠
附焉直北去雲中界五千里下馬拾文石鐵繡羅紋如

世襲故甲至進

海南香樹根歸持贈予克怪石供猶記土官譯其地曰
挈喇克帶搜疾不喇也其弔詭放意如此三十年間自
平原省會以外足跡幾徧天下然訖無所遇合木庵無
幾微不自得讀書痛飲酒以昌其詩其詩之昌惟其作
之之旨昌也昔予與乃祖問詩於顧先生先生曰詩從
讀經史中出者上也從讀賦中出者次也從讀詩中出
斯下矣吾不能詩尤不能時人之詩詩有作之旨經所
謂溫柔敦厚者是已若時人之詩今在君家宮保之門
當是時游於宮保之門依以揚聲者以天治為溫柔以
堆砌為敦厚木庵發軔不無染指其間其後思顧先生

語悟遂進而求之韓杜更進而求之風騷漢魏陶謝更進而求之左國馬班涵泳濂洛關閩之學尤好南華楞嚴而悉以供其詩此其作之之旨也詩多至萬餘首所見進輒自焚之其存者百之一二耳木庵又言餘年暇日空山獨往不惟其詩且以學佛老矣用是益為其詩助喜宮保之詩所謂時人倚以揚聲者桐城飲光兄獨惜其一生不識詩家有悟入一路蓋不知苦吟故亦不知有苦吟後之所得思惟路絕忽有觸而自然呈禪家所謂絕後再甦者非悟乎杜云語不驚人死不休韓云文如翻水成初不用意為皆是物也木庵空山學佛時

此瞿故甲呈進

思吾言更進一解以印之康熙乙亥夏四月浴佛日叔祖陸燦序時年八十有四

自序

九歲學屬對遂學詩十三載同里雪屋孫先生定遠馮先生族祖湘靈先生見之皆驚其可教遂刻意為詩三十年詩多不可美隨手散去無存者澄江有繆生者篤好予詩搜羅得萬首選定三千餘首手錄焉予弗知也或告予試訪之信然出示予予攫得燒之繆驚歎累日自是絕不作詩即作益艱得即得輒為人持去檢吾笥無一詩甲戌秋訪海昌陳觀察傅岩於天雄傅岩正色責予曰子心力盡用於詩乃散佚若是予老矣一旦死不傳負前輩指授非子之罪耶予媿謝然業已亡其藁

不得已求諸腹笥得三百餘首明年歸從友人扇頭壁
端得二百餘首遊餘杭遇故友山陰朱莪亭子衣客得
其所藏百餘首聞吳姬呂月僊者蓄予詩甚夥訪之死
矣啓其奩得其手錄幾四百首合之共千首取陶詩語
名之曰撫雲集族祖為之序置篋中未嘗示人又十二
年取閱之覺其雜復削其半存其半編次成帙命幼子
霽錄以呈傅岩時康熙丁亥立秋日

世襲故甲呈進

撫雲集卷一

古樂府

虞山 錢良擇 本庵

樂府之亡久矣太原郭茂倩樂府詩集蒐羅
極備體裁之可考者盡此矣漢惠時夏侯寬
為樂府令因以名官至武帝以李延年为協
律都尉詔司馬相如等賦詩合樂始有樂府
之名自漢以迄唐五代凡樂皆詩也然曹子
建陸士衡樂府當時號為乖調魏晉宋齊郊
廟等歌辭樂工增損本文以諧節奏多聳牙

不可曉解元相微之亦謂木蘭仲卿四愁七
哀未必盡播管絃則是凡樂皆詩而凡詩不
皆合樂故詩與樂府分而為二唐史臣吳兢
中睿間人也撰樂府古題要解二卷傳其解
不傳其詩至於郭氏所載郊廟燕射歌辭乃
朝廷承祭祀饗賓客所用詩人不可無故擬
作其題皆吳氏所不載也長慶中微之病泔
襲古題唱和重複不如少陵哀江頭等作即
事名篇空所依傍與白樂天李公垂輩共擬
之所謂新題新義皆詠時事也於是古樂府

世襲故甲呈進

與新樂府又分為二自時厥後凡用吳氏所
載者謂之古題用古題而不本古義者謂之
古題新意其直詠時事者謂之新題延至五
季猶有作者至於宋而樂府亡非樂亡樂變
而詩亡也歷代以詩為樂即詩人未必能歌
而多通音律故一詩出而傳播伶人之口世
變日新愈趨愈下唐之世古調化為今體而
樂因之宋之世今體詩化為詞而樂又因之
詞者詩之餘也詞化而曲又詞之靡也宋以
詞為樂金以北曲為樂元以南曲為樂前明

至今南北曲並用又有北人之小曲南人之
吳歌皆樂也而未有復用詩者樂既不用詩
則詩皆不合樂宋以後詩人所為樂府皆不
可以聲求之矣近代作者不考古題新題古
義新義之辨各以臆見行之如李茶陵樂府
文則奇矣吾里詩者馮班定遠謂其既不諧
於金石又不用古題又不詠時事直是有韻
之史論謂之詠史詩則可豈可謂之樂府乎
李于鱗擬樂府取樂志所載章截而句摘之
不待有識者而後知其謬也夫古題隨事寄

世襲故甲呈進

託猶三百篇之賦比興也最初創始之作其
事云何因以為古題其旨云何因以為古義
當時倣之作者即已各出己見不相雷同乃
於千百年之後踐迹而摹其影響是亦不可
以已乎鍾伯敬謂樂府某篇似詩詩某句似
樂府令人絕倒不足與辨矣至於令人以新
題新義為樂府其不可有二一者唐人新樂
府無不可歌者白傳七德舞諸篇自言篇無
定句句無定字皆可播於歌令人不傳歌法
豈可直詠時事而謂之樂府乎二者唐人新

樂府皆詠時事今若詠時事而美刺顯然非
庶人不議之義也庶幾用古題出新意雖音
節無稽而體裁近似如劉文成高太史所作
誰得而議之病榻無事漫擬數十章後之君
子其有以教我

長歌行

高天覆圓蓋厚地持平臺造化不憚煩一氣勤推排日
月奉律令刻期交往回萬有類充塞翕然起喧逐新花
繼枯木喜雨雜怒雷龜鶴傲蜉蝣麒麟悲虎豺得糝羣
蟻樂失龍大鵬哀人亦於其中隨之長嬰孩觸醜彼化

世襲故甲呈進

土蒲雲此凝胎羲軒若不死鬚髮當皚皚况止百年耳
擾擾胡為哉無何有真鄉長歌歸去來

短歌行

有花如錦有月如霜有酒如澗有客滿堂舉酒屬客一
舉十觴聽我短歌調短聲長古今同盡傭丐侯王如其
不盡苦樂無疆天公妙用變化靡常迭以欣厭熱彼中
腸事往思之大夢茫茫快哉此夕盡意猖狂如求可久
日出西方

上之回

駕飛龍考維鏞烽火息道路通蕭關五時莽蒼中制度

狹小唾元封四海為家好山水煙霞處處皆離宮登之
眾探禹穴折殘春夏秋冬花踏徧東西南北月

婕妤好月

合歡扇明月團團掩嬌面送盡輕風九夏涼未離君手
君心變秋菊春蘭一時好穠華那得終身保長信淒其
失寵人都忘當日承恩早紅樓儘有傾城客蛾眉未掃
雲鬟白

門有車馬客行

門有車馬客云從故鄉來款洽展舊好問訊生新哀里
閑少居人同心樂塵埃無人延郭隗叢集黃金臺迴頭

世譽故甲呈進

青山遠仰面朱門開相戒問歸期思家念成灰借棲究
無枝遶樹空徘徊窮途成分內此豈人情哉

猛虎行

南山風急白額吼四出食人不食獸人日少虎日多往
往晝入城不聞夜渡河到處田疇印虎跡血肉縱橫虎
仍瘠咄嗟猛虎可懼哉將見收牙斂爪復化為牛哀

飲馬長城窟行

飲馬長城窟水寒冰正堅馬渴競蹴水蹄滑不能前塞
垣少爭戰萬里無烽煙歸之華山陽人馬同息肩息肩
豈不樂講武當遊田不如戒圍人縱橫牧民間計口督

耕夫朝暮汲井泉

野田黃雀行

黃雀畏鷄不畏羅鷄不如羅得雀多鷄以強凌弱匿影
蓬蒿不能索羅以逸待勞周遭密布無所逃欲覓無羅
野田宿野田無羅又無粟

戰城南

戰城南陣雲深白刃浴赤血頭斷不可尋成功姑勿論
殺人殊快心鼓鼙雷動全師勝殘敵魂褫不能勁何須
濶劍與長槍將軍用兵有天幸

巫山高

世襲啟甲呈進

神女來王不往夢見為真覺為妄楚國君臣枕席同定
情恍惚虛無中巫山高巫峽險泯滅到今疑陽臺在指
點若使巫娥可求取世間何處無雲雨四海千山復萬
山一山選一如花女

將進酒

將進酒酒須酤金盤露椒花雨和太甘勁太苦苦難嘗
甘易與易與人同嗜難嘗人莫取若以勁雜和信與噲
等伍知味令無醉鄉主

君馬黃

君馬黃我馬白一馬分馳不同跡躡雷追風永相失一

馬隨穆王銀鞍繡襜萬里流沙長一馬伴支遼吸泉嘶
月舉世忘神駿

有所思

所思不可見可見可不思茫茫八極饒路岐美人安在
安能知移高山塞深水壙垠大道平於砥乘莽眇御鴻
蒙圓蓋狹隘如壺中我所思兮有時見青銅鏡裡芙蓉
面

折楊柳

行人折楊柳行行向何處處處捲東風天生別離樹掛
月武昌門飛雪隨隄路只許紫桑人攀條賦歸去

臣瞿故甲呈進

雉子班

澤雉不登木于飛鳴角角野處無所求十步偶一啄錦
翼開張五色絢出沒平蕪有人見文章未上舜衣裳潛
機且避如臯箭爾既耿介誰爾容去化為蜃蜃化龍改
頭換面翔空濛

臨高臺

高臺高百尺俯瞰連雲萬家室不分閭閻與閭閻曉暮
嬰煙籠樹色室中各有乳下兒漸壯漸老無定時遠不
待百年物是人盡非臨高臺我心悲

關山月

空閨照獨眠即此關山月關山苦征戰都忘幾圓缺秋
至商氣新中天駐冰輪清光一萬里百萬別離人笳鳴
殺聲動戰血迎涼凍新鬼趁清光齊赴空閨夢

梅花落

笛聲哀近邊城作蓬婆滴博梅花落邊城自古無梅花
清角吹春到沙漠江南二月梅花鄉遮山映水花茫茫
一白數千里天地皆寒香寒香一夜飛狼藉風勁南枝
不能敵惆悵落梅花都是邊城笛

瑩篴引

公無渡河公竟渡津卒驚看不知故公先妻後齊捐生

世襲故甲呈進

麗玉寫出瑩篴聲公渡河蛾赴火水火等殺身爭趨一
何果忘死人心類此不吁嗟麗玉好來中國彈瑩篴

烏生八九子

烏生八九子子又生烏生不已潁川使者露餐時烏攫
其肉太守知太守知烏已飽太守能治民不能治烏翦
其爪郵亭側大道邊肉無多烏蔽天

陌上桑

彈箏歌陌上桑秦女決絕邯鄲王女能貞王能賢王豈
無勢凌嬋娟身雖免事已危何苦漏洩春光為掩爾戶
歲爾身絕豔天下無留人人一去無時歸提筐誰復憂

蠶飢

從軍五更轉

一更角聲歇連營燈火滅人靜月漸高萬帳白堆雪

其二

二更人睡熟刁斗聲續續中軍猶未眠置酒吹橫竹

其三

三更月中天碧落寒無煙毳幕漏春光直下射枕邊

其四

四更笳聲動驚斷還鄉夢頰面爭汲泉舉石敲冰凍

其五

出瞿故甲呈進

五更蓐食既干蹄雷殷地朦朧望前岡黑點如敵騎

燕歌行

燕山霧結髮鬆花燕姬長眉鬢膽沙龍腦裊篆穿牕紗
織手呵凍彈琵琶曲終無語羞隣娃隣娃夫婿征褒斜
三年轉戰逾三巴彎弧突陣殺五犯有功不惜歸期賒
兩身雖遠心無他賤妾笄笄等無家良人何在遊狹邪
意憎貞靜憐繁華別離咫尺同天涯粧成祇博閑人誇
棄捐雖苦無怨嗟白頭吟亦瑜之瑕嚴城鼉鼓方三搗
拜月不拜金蝦蟇

讀曲歌三首

撫雲集

海虞瞿氏鐵琴銅板影鈔本

歌太苦完完白玉盤盡入蝦蟆肚

其二

洛陽產牡丹揚州產瓊花濃春無老景相繼化彤霞

其三

凌波洛水神人舊定情新但愛能留枕不知已是夢中身

豫章行

苦相身為女顧盼畏避多所志在取憐妙學舞與歌稍
稍近君前宛轉巧笑瑳君尊若明神屏息伺噓呵幸得
沐寵愛帚釵添綺羅又將蠱惑罪羅織歸脩蛾不如背

世襲故甲呈進

君去奔月為嫦娥廣寒非不樂孤另當如何

子夜四時歌

鐵作梅樹枝冰作梅花片冰鐵遇春溫歡心冷難變

其二

儂住耶溪上歡住橫塘邊水清清徹底非藕莫求蓮

其三

滿月印平池風掠波文皺注目看團圓終宵不成就

其四

儂心似寒雞夜半便疑旦呵手摸熏爐無火惟餘炭

烏夜啼

白鷺烏性慈因以慈為號反哺能慈亦能孝能慈能孝
又能仁官家欲赦烏先報雄雉好文章鸚鵡舌如簧飛
飛向阿閣爭先朝鳳凰烏棲無樹飢無食鷹隼一擊烏
翅傷烏翅傷翅流血霜天夜夜啼明月安得爾生三足
飛直上扶桑隨鬱儀

行路難十一首

君不見有窮后崇朝箭落陽烏九又不見譚大夫作詩
告病尤箕斗日星無事掛高天謠詠傷戕無不有白榆
曉入靈霽歲紅輪晚下崦嵫走嗔者尚彎弧怨者猶昂
首何況差肩疊足場射影鑠金紛手口行路難君知否

世瞿故甲呈進

其二

徐福峭帆東海東神山三朶青芙蓉張騫取道西陲西
尋幢度索緣天梯幽都冰雪明都火寒則重裘暑則裸
六合之外皆人居往來逍遙無不可御風即未習是處
饒車船不然章亥亦人耳胡乃平步無踣顛長安大道
平如砥一蹶梁王馬前死

其三

煌煌閭闔中天開攀龍附鳳屯雲來董賈握齟何足道
摩霄直上皆奇才入薇省出蘭臺蜚聲馳譽彌九垓九
垓之人仰頭望飛仙作隊遨蓬萊茅屋老生愚不曉細

檢孟堅人物表

其四

玉卮浮沆瀣翠釜烹麒麟朱門晝啟絲竹動珠履雜選
來嘉賓入座人一心顧盼忘其身主人固無意顰笑分
秋春行樂追歡朝復夕主人恩重逾金石但願朱門無
改易滿堂俱是酬恩客

其五

綠雲繚繞春山遠芙蓉映水霞光滿驚心眩目曉妝成
影亦生香聲亦暖承恩此日身占斷萬古春妍衰忽遞
嬾寵憎非兩人邢尹相傾勢無已層樓更上輕千里也

世襲故甲呈進

知鶴髮只須臾孟光終不如西子

其六

一笑把君手偕君遊彼都彼都陸海富玉石善賈原不
關瑕瑜君智炙轂輟我頑櫟株駒自顧亦分明人見寧
糝糊違心飾面藏其醜愛非所望能哀否先得路者顧
而嗔世選連城爾何有敝衣那敢言故人願隨屬車奉
清塵絕之兼禁卞和哭惡其石中真有玉

其七

春光先期到燕臺屠蘇酒熟千花開海棠芍藥桃李梅
爛熳不用金刀裁焜火助之長擊鼓為之催豪家春比

炎方早炎方尚待東風來天下農夫無此術刈禾登麥
茫無日

其八

君不見空倉雀無食空有盜粟名巧丸中之正其罪菲
薄亦足供煎烹又不見華亭鶴翦翎博得乘軒寵玄裳
縞袂池館間不知原是凌霄種雀微死一身鶴貴留多
年各有故鄉歸不得蓬蒿之下江湖邊鶴無文彩雀無
肉當免樊籠彈射酷

其九

邯鄲歌者纖腰身長眉高髻驚有神千金纏頭等閑事

世襲故甲三進

五陵無患秦無人雲軒蘭棹惟所致花無開落長濃春
嬌鶯雛燕或化鳳一笑能使門楣新恭姬孝婦良自苦
潔身而死終何補

其十

高架紅薔薇條蔓狼藉同荆榛惜其發生理其亂銛茫
銳刺潛傷人春園釀蜜蜂紛紛來往求花朵憫其辛苦
護其房撲面迎頭爭毒我爾以怨報德我以仁召災袖
手觀之乃知戒味甘色豔可畏哉

其十一

唐虞迄今四千載閉目思之了然在欲考陳迹臚詩書

賦名六合真大愚然而時異人亦異終古不聞行路易
前橫太行後呂梁去之何必無康莊無何之鄉歸路直
縱橫萬里無荆棘

採蓮曲

蓮花深復深不辨蓮舟女如何萬朵中一朵偏能語

上雲樂

崑崙月窟西復西地軸已盡天傾欹豁然直出不可以
里計空明一片鋪琉璃縱無南極與北極橫無昧谷與
崑夷高無山巒深無海戴無星斗履無泥無城無郭不
畫封疆與郡國不衣不食不飲無渴無寒飢中有王者

出瞿故甲王進

曰文康青瞳綠髮長鬚眉不言不笑不少不老不生死
無思無慮無喜無怒無歡悲珊瑚作樹柯葉葱蒨萬里
長文康凝然跌坐其下莫知幾何時盤古開闢初斷鼈
奠四維九九八十一九州文康謂是嬰兒捏土排圍碁
日月轉雙輪光輝徹崇卑金烏玉兔遞出沒文康謂是
卵殼螢火盤旋飛三皇五帝大聖人制禮作樂修倫彝
後王繼起千百世文康謂是蜜蜂演習排衙儀軒轅呂
尚創戎事起翦頗牧稱神奇伏屍流血動千里文康謂
是螻蟻布陣爭蟲尸彭錢殤子異修短文康謂是蜉蝣
朝暮生參差男昏女嫁育子孫文康謂是花間蛺蝶分

雄雌海枯焦若釜山崩碎若糜文康不驚不懼亦不疑
兒女密室中貼耳語呶呶文康不聞不見無不知有人
謗文康迂誕徒我欺文康不嗔亦不辨蚤鳴蛤吠用作
相娛嬉有人慕文康夢想或見之文康不即亦不離黃
埃黑霧之中處處常相隨龍如蚓兮虎如狸麟如狗兮
鳳如雞蟠桃磊磊掌上果若木蠹蠹瓶中枝靈香漠漠
披拂白梅檀卿雲冉冉匝巾紅臙脂踏霹靂兮跨紅霓
虛明空濶文康任意為遊戲嗟世之人兮胡不褰裳拂
袖踴躍從之歸

此書故甲呈進

撫雲集卷二

五言古詩

秋夜作

落葉走撼撼怨蛩語唧唧寒風滅我燈瞬目乾坤黑茫
然觸愁端瞑坐長太息太息七尺軀俯仰何偏側辛勤
到衾影憂虞在衣食墮地生非時捫天遠難即獲捷耗
真性顧盼有疑色嗚呼欲何求求將欲何得勞勞撮虛
空萬古同一惑為世所莫為最哉盡吾力

遠村燈火

撫雲集

海虞瞿氏鐵琴銅劍樓影鈔本

暮色四山合煙光滄林起一點何處明低壓矮檐底乍
搖出疎籬忽閃入流水歸客誤欲投去家猶幾里

觀小妓娟娟舞劍作

蛾眉有英雄晚粧脂粉薄短鬢白衣裳窄袖錦纏縛背
人繫湘裙端捧蓮花鐔請為大娘舞佐此良宵樂取筆
漬硯池授客使分捉舞急各蘸灑客漫應曰諾小立歎
無言左右試展拓微卓蠻鞞尖撒手忽然作初如雙玉
龍盤空鬪掣攫漸如曳匹練旋繞紛交錯須臾不見人
一片寒光爍直上驚猿騰橫來輕燕掠飛霜青娥狂劃
電玉女惡膽落迂儒愁傾心壯士乍羸童縮而遜姦人

世襲故甲呈進

戰欲瘡灑墨密雨叢筆敗硯池涸罷舞視其身點墨不
能著嫣然泥人懷腰肢瘦如削

渡河

白日忽焉暮陽侯怒方赫飄飄舴艋舟倏從半空擲危
於颭空鳶輕於退飛鷁微生指顧間性命付河伯舉手
謝河伯胡為苦相阨吾無右軍書吾無澹臺壁疲骨與
詩觴何足蛟龍食回首語篙師不勞多恐嚇長風如可
乘去訪支機石

扁鵲墓

越人生死人人各死生生命生自死之真我原不病妄

以淫貪軀痛此光明性鏡石無所施辜負醫中聖

西平道中五十韻

自燕徂宋蔡馳驅路三千豫境行欲盡黃茅亘八埏雉
兔乍出沒蚊蚋飛蠓蠓馬背望聚落霰霰儼市廛即之
皆瓦礫壞墻不及肩充塞野薔薇根盤錦紋軌縱橫千
百家十村無一完飢渴苦莫告忽見騰炊煙老翁傍古
槐因以結屋椽編草蓑三面賣酒并粥饘急就索飲噉
入口棘我咽徐問殘破由云已四十年我曰四十年生
齒宜殷繁嬰孩亦長大胡不耕蕪田老翁語客坐為客
試備言先朝崇禎末旱蝗滌山川稂莠皆曠修汲井絕

世豐故甲呈進

浣湔穀盡食鳥獸禽盡食路人路人亦絕跡乃各食所
親老羸靡孑遺強壯僅半存殺運繼之作屠戮過澗澗
賊魁張獻忠豺狼遜兇頑破賊舉高會名百子昇天縛
棚聚兒童下煽烈火然叫號齊跳擲賊笑口流涎吞嚼
當脯醢肉坻血流泉次則取婦女分別醜與妍醜者雜
男伍割腹舖肺肝妍者褫帚袂裸體立滿前淫訖截其
首把翫曰可憐尤嗜啖纖足號為炙金蓮羣凶習成風
市地鋪腥羶四郊無隻影拔管乃他遷黔首族類盡化
育天失權空桑不能孕種姓何從延我本靈壁人貿易
汝漢間被刃仆陽死賊去幸得全目擊慘毒狀頸創猶

留癡亂後到西平羅掘圖饗殮衰耄不能歸賣漿大道
邊客去無濡滯兼程勉加鞭令明後三日麤糲得亦艱
南出武勝關稍可致甘鮮我聞老翁語股弁肌膚瘠飽
餐倍酬值跨鞍涕漣漣蒼生何至此三災無後先吾里
時給諫作宰民稱賢刀兵饑饉中憂患紛熬煎作詩寄
江南惜其辭不傳聊韻老翁語以補給諫篇給諫名敏
為修縣令
作寄江南行憶其中有句云東鄰有婦纔入釜西鄰咆
哮對妻怒銜刀涕泗呼吾子吾不啖爾人啖爾暴兒雖
暴亦可憐逢腐肉口流涎耄婦脆最分別哉矣肥
白稱豪筵結句云為書此詩寄江南柔土網繆須努力

青螺谷

曉出武勝關暮入青螺谷行人逐歸鳥披枝入叢木滄

世瞿敏甲呈進

鬱罩濕雲碾磕懸飛瀑萬山擁一身無情疊濃綠林罅
見燈光急叩松龕宿

洞庭湖四十韻

大地如人身洞庭乃其腹吐納時盈虛中空靡不蓄夏
潦飽而張冬涸枵則縮我來梅雨候奔注萬派濁正當
全盛勢膨脗灑氣足遂令欲濟者攢眉面湖宿蟻船平
沙灘篙師典故熟為言柳神君彈壓龍眷屬是客同里
人威靈庇鄉曲吳人罕沉舟令仗客之福啞啞檣上鳥
茹素少食肉是乃神君使敬哉慎毋瀆又言清秋夜曾
泊君山麓湘君湘夫人蘭旌動肅肅依稀鼓瑟聲兼聞

香馥郁又言見老父長笛鐵如竹吹作大鵬鳴騰踴鯨
鼇哭又言老蚌精黃昏豎片設吐出明月珠白毫萬丈
燭語雖雜且誕善誑亦不俗去住恃其謀何敢加催促
平明解纜行布帆拽滿幅直搗湖中心四顧何所矚下
水上雲天罔巒遠匿伏舳艫銜尾來衝波影相續帆同
風力異前後互遲速篙師據柁樓瞻眺不停目大呼風
礮到巨靈猛一蹴舟躍鴻毛輕豈覺受千斛駭浪湧白
頭壁立高於屋卸帆十之五掀簸聽所欲堅坐身低昂
有類乘黃鵠疾飛四百里空濶無礙觸頓見西南山渺
茫青簇簇如可保無虞呼童取醴醪吾聞涉大川以需

世襲故甲呈進

為吉卜今以躁試險洪濤豈堪浴乃知無懼難守敬尚
拘束非無宗慙豪其奈馮夷酷既濟轉寒心暫往旋當
復

鄱陽舟中望廬山作

五老老而尊屹立逞奇峭自恃不騫崩偃偻恣遠眺頂
蘸銀河沐肩擎北斗糴減四洛下英添一商山皓周遭
矗羣峯兒孫亦非少嚮背各爭雄崛強莫相肖勁骨乃
畏寒濃雲裹裘帽罡風掣之破隱現矍鑠貌開闢迄於
今筭年誠已耄從地上梯天計程定中道我來雨方急
昏黑同一罩忽霽見青蒼巘巘向人笑

寄內傲樂天

去年秋風動辭家東北走冬春三寄書得免浮沉不初
夏離京城兼程到漢口揚帆過洞庭南謁長沙守信宿
即迴舟所得惟桂酒順流渡鄱陽已到南昌久水陸俱
如飛投託無一偶然而好江山萬里落吾手南昌兩使
君新交非故友居然愛我詩歎為必不朽問遺日無虛
半月意彌厚意厚為別難兼亦望升斗預筭相見期稍
比牛女後吾父亦遠遊大母垂中壽至誠奉晨昏毋輕
去左右膝前兩兒女生甫離襁褓嫩脆善護持不異養
蒲柳無火續炊煙恃汝為巧婦所念善病身力難堪井

世瞿敬甲呈進

白雜夢亂我心卜之兆无咎慎勿思我悲勉整飛蓬首
恐汝不知詩寄詩傲白叟

玉山道中

聚山百里高分水千里瀉發源不可尋但喜行平野昨
日逆流來明日從流下

有僧談狼山事以三韻紀之

渴鱗下飲海飢鮎啖其首鋸牙不可脫鱗奮鮎在阜相
持一時斃禍皆起於口

金閭舟中寄同里故人五十韻

束髮嗜詠詩身以詩為骨放眼照千秋鉢心搜萬物琢

句春媚花豪吟秋喝月氣舒江滾滾調苦蟲切切響走
寒松濤健打霜天鵲鑿險層峯頽窮幽九泉裂齒牙嚼
甘辛腎腸轟槎枿鏤空言詮斷入奧思惟絕湧出不自
知百怪罄一噦僻居寡朋儔詩就絨其舌維時里閨中
尊宿稍衰歇鉅手絳雲叟墓草埋豐碣族尊東野王冥
漠遊馮先生興公躋大臺孫先生矯矯鼓瑟翁間關秣
陵牽湘靈族繼起幸有人作家尚森列我念長離羣鄭
圃形影子馳書延勝流登壇賡白雪開我招隱堂遠近
來英哲老成前輩五龔圓石陳在茲鄧眉把臂執友八
沈秋士龔列御黃子鴻馮補之餘多新相知三十人欠
戴介眉薛孝穆許暘谷家羽王

臣瞿啟甲呈進

一主賓既就座有客創為說請倣棘園法糊名校工拙
公論推祭酒瑕瑜就之決詩成易書呈次第判甲乙小
大臚觥籌殿最差賞罰昭容紙欲飛沈宋未分別觀望
笑閨堂錦標定誰奪居然類觀榜相顧皆內熱可以驗
名心兒戲關得失此詩擅場者繼秉詩衡筆更代主齊
盟有似傳衣鉢放蕩誠踰閑高興亦可悅不惜秋兔髡
所患綠蛆蝎諸君備眾美騷雅不同律鐘塔振金聲續
紛飛玉屑敏捷競鬪奇鈍澀我獨劣而亦有微長面目
必已出削肥務為瘦汰縛著其潔識者或取焉激賞頗
過實顛狂幾何時徒侶半存沒凡我素心人有窮無一

達良會不可再惆悵那能忍迴首幼學齡嘯詠無虛日
僻耽得之天勤苦利鐵硯百鍊終未精青銅見華髮今
將挾瓦管賣之療飢渴憚把東臯鋤希售齊門瑟豈忘
吾計左八口待以活襍被西北遊短棹凌風發推蓬望
故人煙波莽空濶

苦熱

六月大雨過烈燄從地起上騰徹層霄還入重泉底中
天停火輪閃爍怒直視下土皆仇讐盡遣立焦燬萬木
曠其乾百穀斷生理飛鳥雜沓墜走獸枕藉死肖翹揭
枯莖鱗介爛沸水人稍黠於物百計衛其體暫眠九遷

臣瞿敏甲呈進

移終食十盥洗纖絳敵重裘著膚作瘡疖忽然躓而僵
肉腐不可徙當有幽都涼聚彼避暑鬼燕郊號高寒毒
熱乃至此風息雲絕影半月勢未已吾方肩囊書徒步
一千里

謁虞義陵

一畫破鴻蒙斯文開鼻祖哀彼長夜人故將天地補傳
之章句儒白髮死訓詁從此起爭端異同不可數我亦
一微塵冷眼笑萬古再拜告至人勿更搏黃土

哭鄧甬堂徵君四十韻

濃霜殺秋蓬甬堂竟客死造物毒詩人嗚呼何至此憶

昔初識君子長未及几已有詩人名籍籍入吾耳識君
二十年予亦操觚起盍簪集雕龍樹幟麈羣蟻君獨最
後來長身不衫履放口高吟哦落筆輒滿紙其年歲云
莫僧寮予病瘡黃昏叩門來投我菊與杞明年我擔簦
前君遊帝里君著大布衣携詩獻天子北風長安道握
手紅塵裡三百六十日過從無虛晷太液眺晴雲杜曲
尋芳芷賭酒涸黃壚雄談破嚆矢相隨訪荆高相戒謁
許史不知放浪非頗憎奔競鄙京華錦繡堆骯髒我與
爾人生意氣合何謂非知己新令選宏詞旅進對階祀
蓬萊三賦成歸來顏色喜自誇藜藿腸飽喫太倉米佺

臣瞿啟甲呈進

期豈遜人玉川或遭毀君意殊灑然白眼看青紫莫春
君生日甲子一周矣欲我為君壽請以古松比贈以古
松歌君愛諷不已索寫高麗牋珍藏勝文綺秋深我飢
驅揮鞭逾洛水煙草隔冬春相思斷雙鯉雙鯉今日來
猶猜是君使失意急開緘淚下不可止別我未半年已
為三月鬼憶君送我時豪興如稗齒豈有爐炭煎頓令
金石燬冀北雲漫漫江南水瀰瀰魂若覓家鄉虞山青
處是我欲葬君骨劉碑樹山趾大書鐫其名詩人鄧林
梓

北發過下相大雨不止路窄泥深艱險備至同

行為從昆敬旃孫子嘉子騎不能前買舟南返
予冒雨獨行

雨急老拳紛泥滑新酥膩足如枉矢流一跌下無地堪
嗟貴公子空有青絲轡

醉中示門弟子四十韻

天地有靈氣盤鬱塞八荒蘊久成百怪洩之以文章六
經涵大海百氏迴天潢涓涓分派異滾滾真源長灝氣
盡秦漢爭端起晉唐制科縛天下蠻觸排戰場伏屍流
血時敗者皆悲傷迴視賭勝地蝸角如針銜問天競搔
首造物終木彊傀儡偶然戲那能費品量千五百歲中

臣瞿啟甲呈進

歲歲槐花黃擾攘竟誰悟野馬塵空揚我幼貧失學坐
井羞望洋一勺聊自潤稍勝枯魚僵負笈走寰宇陰欲
求班揚見多心愈倦樸拙守我常開口人欲殺敢辨鹿
與麀嗟子從我遊母乃失所望苦搜貧兒寶未辦宿春
糧負子求索勤一語聊相償千古不死心譬如日月光
罅隙自耿耿大空自蒼蒼吾生浩然氣譬如大風颺入
竅無所礙拔木誰能當二者人盡具我爾同包藏生生
了不窮遞嬗如陰陽前人恣掠取曾不減豪芒刮磨與
培養其事宜周詳紅爐鑠頑鐵百鍊成銜鋼嘉穀得時
雨穎粟盈倉箱勿見過鳥跡對之學翱翔廣眉配高髻

時樣新梳粧塗抹心力盡何異邯鄲倡麝臍及龍腦百
和成芬芳既燼聞焦枯何如王者香雞鷲埒間物珍之
等鳳凰涕唾人所棄甘之為酒漿險勁讐山石塵腐愛
秕糠此病吾不解請問諸長桑迅霆起眠夢神針起膏
盲求之若不驗浮我千百觴燭跋夜氣靜淡月流輕霜
醉語多謬誤莫笑先生狂

得三叔父書知佐幕彝陵却寄三十韻

昔笑高達夫五十始一薦臣叔誠不癡胡為久貧賤家
學念我祖白首不釋卷六經窮鑽研羣史入錘鍊骨髓
搜莊列儕輩視修洵尊宿老宮保

東澗族祖

抑首每稱善彊

臣瞿啟甲呈進

項顧夫子

仲恭先生

旗鼓讓一面攤書課子孫獎誘少呵譴

在子叔年韶在孫我首弁愛深望尤切提撕忘寢膳棄
我二十年依然耕破硯我素不更事惟爭筆力健叔能
助我父綢繆計萬變徹桑固危巢抽刀斬亂線得暇不
肯愁花間聚親串苦飲賭鯨吞酸吟和鶯囀此樂能幾
何猶未許留戀飄飄波散萍去去弦吐箭高翮托長空
遠近惟所便去年荼蘼開相遇西華縣一夕燈火同七
度斗杓轉燕山望楚水萬里何由見乾鵲報書來開緘
淚如霰彝陵腰脅地三載疲酣戰主將非哥舒安能容
俊彥故廬青草深高堂紅日晏努力歸去來從軍豈夙

願我抱點額悲衝波鱗鬣倦尚向逆濤中晴天盼雷電
祖德在詩書敢讀班超傳

趵突泉

濟水西北來悍急且輕剝旁枝折而南山根扼其道伏
流不得洩厚力潰三竅勢鬱力愈勁突出波瀾峭直上
一線源逆流五尺瀑銀花燄不窮玉龍尾爭掉噴湧曉
夜同未嘗分旱潦暑月涼意生暗天雨聲鬧為水亦無
多積成數畝沼後人因奇勝營建仙真廟畫橋復飛閣
頗飾耳目好凭欄玩物理洵知化工妙我欲輦巨石塞
之觀所造真氣豈受過深思嘿然笑

臣瞿啟甲呈進

琅邪東亭先生阮亭先生仲兄也庚戌登第辛酉夏謁選京師見予文而歎賞有國士之目是秋示疾厭世易簀時手予詩一帙以瞑然予初不之知亦未一識先生也壬戌三月過琅邪里第先生主器敬遠出遺照索題因揮淚再拜而作此詩

先生愛我詩携我詩入土我今見先生先生胡不語知心不識面七月判今古髣髴想平生吟成淚如雨

瀟灘阻雨

乘龍赫斯怒掉尾掀孤蓬一擲上空灘沙石相磨礮急

電火連爍雨脚如杵春何以在我身葦箔三四重稍勝
鳧與鷗子立波濤中舟前高岸崩奔流當要衝蕩舟不
得上舳艫如艨艟三日行十丈舟師告技窮濕席低壓
頂四客類蟄蟲有卧無行立偶坐必鞠躬人家隔白浪
適市靡所從枯茶當美醞烹藿如脰熊奕棋少對者我
弱猶稱雄無異楚出師一獵諸姬空畫永不可遣入夜
愁逾濃夢亦怯風雨不返東吳東蝶魂未能化豹脚來
相攻隣舫喧囂語蠻獠雜兒童徒侶迭嗟歎我心靜不
悅嶮巖塞天地艱難四海同遲速聽主宰吾爾何匆匆
欲召五力士為我開鴻濛填平十八灘千里康衢通蹠

臣瞿啟甲呈進

倒大庾峯無使高巖從直達五羊城快馬如飛龍此願
不可酬吟詩禱長風

峽江遇張滄枝得秋水弟書知尚客江右却寄

六十韻

少年豔奇遇心輕蠹書魚慷慨辭室家汗漫試江湖庚
申夏相遇陳州城南隅問汝胡為來不語惟長吁徐言
苦貧乏故鄉不可居歲凶禾不登賦重骨髓枯怒吏晝
捉人比鄰半逃逋新婚未一載有婦無完襦六親厭緩
急求請必恣睢實亦各艱難不止情誼疎雪消螢乾死
展卷氣不舒典我屋數椽鬻我田一區父子適荆楚二

友龔張俱張子素任俠其力稍有餘同行二十里恃以
無艱虞我聞頗不然欲語口囁嚅重恐拂汝意酌酒為
歡娛勉圖相見樂酒罷心躊躇出誠非得已此去將焉
如明朝河橋別贈汝惟淚珠常棣無知物春光被根株
我實為人昆坐視愧友于再拜禱虛空毋令困崎嶇從
此一千日池塘夢亦無傳聞西學仙平地尋蓬壺更聞
東涉江覆舟死須臾又聞歸不愜重作月明烏所聞無
美景反龔傳言虛望切彌汝怨怨汝無尺書濟南老名
士拉我之番禺峽江風雨夜晝船泊菰蒲波心見舴艋
蕩漾來如鳥有客推篷呼先生無恙乎聞呼愕然顧凝

臣瞿啟甲呈進

眸立斯須來者真張子我目非糶糊挑燈話徹夜扣舷
但欵欵張子本白哲今何黧且癯汝亦當類是兩人等
窮途投托無一可路鬼齊擲掄寄汝無他詞久客非良
圖酸蔑一言善傾倒晉大夫士衡挾短策才名震中都
伯玉碎胡琴聲價騰璠璣建封柳下談連舟載名姝洵
哉英傑事已矣今昔殊天心薄文士人情鄙寒儒屈指
十二州何地為康衢倦飛鳥知還努力賦歸與江上茅
三間蓉菊久荒蕪樂飢仍分內何必憂朝舖尺蠖屈求
伸慎勿憚勤劬悠悠任相笑漠漠將酬諸欲行即千里
無煩足超超欲售即連城豈甘乞錙銖能為鶴冲霄何

如雁銜蘆老兄坐失此輕霜上頭顱汝今幸未晚善保
千金軀吟詩遠相戒知汝將謂予予實浪跡人最汝何
其愚

英德道中三首

顯晦真無憑青山亦有命通都大邑間好事選奇勝偶
然得培塿遊者肩相並樓臺酷點綴絲竹連晨暝本無
真面目惟爭所託幸豈知蠻獠鄉韞此神靈境舟行見
遠峯礪峴互掩映須臾無所見荒厓夾紆徑捩舵稍一
轉豁然兩山迸奇石劈面來驚視目為定或如蔽牛樹
擁腫遍生癭或如擢人獸狙伏悍且獷或如大旆揚風

臣瞿啟甲呈進

急不能正或如槩几卧潤滑拭初淨鷓鴣九尾長夔立
一足勁或洞其顛顛日光逗圓鏡或竅其膏膏佳木從
中孕險怪萬態中時時出閑靜閑者如老僧跏趺貌莊
敬靜者如美人小立新粧靚此特東偏耳其西不可竟
吁嗟開闢初造化何豪橫嬉戲運神工雕琢盡物性而
不產中原恐益人貪競問此山何名居人不能應

其二

又折而西南兩山頂平秃其名一何陋香爐與蠟燭其
色渥赭焦其狀怪且俗石稜縷縷盤似經巨絙束對峙
百丈外石梁相連屬橫空作三字疑可度人足湏臾過

其趾舟入兩山腹乾爻忽變坤三梁判而六此景誰斲
成山靈亦勞碌虛空現小巧徒為炫人目

其三

英石時所尚豪家爭致之一卷數金值巨者世尤稀取
置几案間什襲同鼎彝若能購盈丈相詫為珍奇豈知
此珍奇拋擲滿荒陬小者亦百尺亂山如布碁一山更
險絕割然瞰江湄石壁平於鏡金碧光陸離側出勢欲
壓仰看疑墻頽崖端垂石乳如杵復如錐何代好事人
異想逾工倭穴壁漸深入妙施鑿與椎石堅質細膩彫
琢惟所為剔作樓三層玲瓏具棖題方者欄與檻圓為

臣瞿啟甲呈進

柱與搯列軸轉戶牖鏤花飾門楣疾雷不能破返照俯
可窺廣容千人坐四面窮攀躋其上禮慈雲梵放聲深
微其中供寢食其下備釜炊顏曰觀音巘峭削而不危
奇哉奪天巧瞻眺解我頤豪家若見此當乞愚公移

彈子磯

青山不近情有骨都無肉壁立青溪旁千仞削蒼玉欲
登不可梯欲看舟去速詩中孟東野寒峭誰能讀

讀壇經

四十不知佛沉錮醉夢場狃於互鄉習誹議恬其狂一
線留微根得染甘露漿意外見至文法寶經十章驚歎

汗如雨口嚼不可張何期臭腐軀韞捷含靈光山海有
枯爛吾性無銷亡忘言思慮絕宛然見空王旅人識家
園喜極彌傷悲若更不知歸嗚呼客何方掩卷拜稽首
如登祖師堂

葉園

故大司農葉公別業
在惠州西湖之南

兩月居惠州學宮戶長鍵今日放脚行逸馬脫闌圈舉
頭見城外孤塔凌絕巘烏可不往遊同遊憚其遠勝情
終難奪一奮鼓眾嬾步出城西門塵襟豁然澣羣山擁
擠來西湖水滿滿登山憇蘭若南望見亭館試問白足
僧云是尚書苑下山惜不早紅日三竿短紆迴至其前

臣瞿秋甲呈進

綠池盈百畹竹塢導王獻蓮舟迷靜婉入門不見天嘉
植千萬本可辨惟黃柑結實大於盃瑞草張鳳尾甘蕉
垂鶴卵餘多海外種縱橫覆如繖樓臺頗不俗少續而
多斷雕飾雖鮮華布置甚疎散園丁知禮貌獻茗語款
款備言啟禎間尚書職補袞身沒未十年乾坤變混沌
有子執金吾桑土幸安穩前年海倭來倉皇被兵燹名
花刈作薪珍果啖如飯盤踞歲再周兵敗乃宵遁主人
亂後歸高下理損難復舊時觀瞻眺輒憤憤我聞听
然笑主人未思忖地居蠻獠鄉時值萑苻悍三徑故依
然樂土嶺右罕試看春循梅幾處保里閑語罷暮煙合

櫂舟送客返隱隱籬落間
疏牕透絃管恍若遊仙源
意外作劉阮好景在斜陽
毋嫌得之晚

水車二十韻

吾鄉用水車運以人手足
楚地箬作蓬乘風轉其軸
粵俗又不然簡便而迅速
即以水戽水汲灌惟水獨
傍岸湍急處兩柱持一轂
製取堅而輕直木四嚮轟
團團竟二丈左右各十六
木端織細篾橫障十六幅
入水五尺餘截流受水觸
前浮後已沉幅幅相追逐
迴環象乾旋曾不間曛旭
一木縛一筒筒皆如椽竹
俯下仰口上取水如量粟
篾力舉之升至頂乃傾覆
承以小瓦溝汨汨

臣瞿啟甲呈進

流相續直達畎澮間遠近
惟所欲禾登水無用移槽
使不屬亦無晷刻停魚貫
潑懸瀑人疑水車勤不知
水勞碌車水兩無心人心
籌筭孰出此機械巧網盡
安閑福猶憤耕遲遲吃叱
鞭黃犢

山火

粵地無閑山寸土皆種植
險長茅蓬蒿平栽稻菽麥
樵刈不到根餘槎多滿尺
放火悉灰之可以腴地力
深冬久晴後縛炬順風擲
烈燄縱橫飛羣山一齊赤
樹木不傷理稍稍皮焦黑
可念惟蟄蟲何術逃此厄
舟行日將暮羃屨煙景碧
忽見萬火龍盤旋過山脊
炎炎無定形

溪澗不能隔倏然楮以長或則圓而圻乍合復乍分祝
融勤擘畫絳雲高下走急電東西劃恍疑金人箭閃爍
蔽江射又如丞相燈五更朝紫陌虞詡雞亂飛田單牛
四逼樓閣燬阿房旌旗塵赤壁紅影薄衣裳空中聲磔
磔客曰此大觀變化記其迹我獨求其理抑首自尋繹
熒惑星之妖離明卦之德燧人始鑽木教民熟飲食宋
衛鄭陳災春秋書改革為災非細故為德止炮炙何人
創火耕用之太狼藉殺舊以蕃新其道本生剋五行火
生土木剋土漸瘠得火助元氣母盛子自益朽枿既無
用淨盡斯為得燔灼無孑遺生機盎然溢如人洗瘡瘕

臣瞿啟甲呈進

垢盡身光澤精爽乃發揚此理不可易作詩述所見思
拙筆有棘徒仰陸渾篇落句如山石

蓬辣灘

地勢誠不平水怒胡不已匹練一千丈猛蹙銀花起蛟
龍鬪我前雷霆撼我耳亂石蹲中流扁舟拽百指逆上
登蒼天順下激飛矢黯淡與惶恐二險未足比雖險無
可畏其怒止於此三老刺長篙深淺測其底江海雖安
瀾力能制生死大小器量殊悠然悟物理

荔枝

粵山天下奇千里錯金碧大海環拱之雲霞日噴激佳

氣搏虛空彙於荔枝積五月薰風來萬顆同時赤皮蹙
龍鱗圓膜襯葦綃白摘聞蘭麝香剖滴醍醐液玉肌太
豐肥飽填絳囊穹入口神爽然春意盡胸膈渴病既消
除詩脾亦潤澤此是仙家果胡許凡夫食食多或損人
此語真無識絕豔得妃子亡國且不惜

颶風三十韻

坡老賦颶風謂與噓呵同大言有至理非以駭凡庸高
涼秋雨夜酒酣睡方濃猛然屋漏下滴滴水貫胸驚寤
仰見天屋瓦半已空萬馬奔躍來莫辨西與東壞墻等
裂紙拜樹如彎弓昊蒼不勝憤伐鼓鞭羣龍奮勇助風

臣瞿啟甲呈進

伯午夜急戰攻捲乾滄海水推倒黎母峯大地雖不動
亦復聲隆隆滿城十萬戶微生比秋桐恐隨落葉飛竟
墮鮫人宮破腦兼折脰左右號猺童悲哀不忍聽願使
兩耳聾我室謂堅固高垣倚崇墉大崩若破陣輒石飛
蝗蝻相去五步內僅不糜我躬求庇無可恃趨託叢菁
叢茂由得簞笠布被聊自蒙蹲踞以為安豈復憚泥中
四望墨一色難盼扶桑紅我身雖戰栗我心固冲融凝
然無恐怖稍念學道功天公侮下民作戲以相窮雖暴
亦奇絕胡可不一逢擁鼻賦新詩高吟氣仍雄還鄉傲
故人勿復言蘇公欲知颶母狀從我求詩筒

渡海四十韻

大海過中秋此景未試嘗奇遊冠平生九死庸何傷雷
瓊相去路遠近皆荒唐洪波淼無際里數誰能量海氛
特怪異終古東風狂風東水西湧夾舟猛相當截流南
北行捩舵操主張稍遲潮欲落水柔風力剛瀉入交趾
海弱水無浮航我來八月望開帆凌渺茫帆開目盡閉
一望神魂亡半天舞青山當頭壓桅檣輕舟裊虛空頃
刻變低昂忽墮陷井底忽騰逼穹蒼其聲雷砢礮其色
血玄黃舟中無定身觸物抱持忙卧則掀之起坐則蹴
之僵各以繩自縛手足交撐撐叶榜人大哀號潮退風

臣瞿敏甲呈進

愈強舟去不可挽魚腹吾北邙又聞大歡呼已可保無
妨拋貓得淺洲舟停海中央水止五十丈深如貓綆長
吾生委大化喜懼心兩忘飢絕炊爨理相顧面帶霜斜
睇見鴟夷貯酒在我傍取勢捧以吸亦足和空腸未幾
紅日沒白毫起東方萬月滾驚浪奔馳裂金光蓬牕透
碎影急電流衣裳強出仰頭看星斗森成行下動上自
靜覆載改其常嫦娥殊不慈坐視我恐惶想見平地人
幾處歌舞腸明晨潮又上貓起帆飛揚抵暮見瓊山一
髮船頭橫叶再宿稍安穩崩濤類康莊震盪三晝夜始
得達海邦叶不眠不食飲去死爭毫茫問我何為者奔

波賣文章

留別鐵樵觀察三十韻

先生生濟南賤子居吳閭夙昔無半面傾蓋出肺腸率
真任古道機變心盡忘不求虞翻媚兼恕羅友狂先生
乘使車南粵司文章以我為權衡辨析窮毫茫有時論
不合旗鼓屹相當先生顧而笑兩可亦何傷我終不可
下持理非好剛久久乃頷首更信吾說長千言無一違
馳驅聽王良得暇共唱酬憂擊諧宮商手自寫我詩寶
惜如珪璋百蠻煙瘴裡追隨換星霜浮舟過大海白浪
襄帆檣生死且共之投分豈尋常自惟骯髒身放蕩翰

臣瞿秋甲呈進

墨場才微而骨鯁入世不自量血性忤權貴讒毀叢刀
槍何期天壤間知己逢襄陽先生排眾口躋我於班揚
此語或遭罵使我陋彌彰不如以默勝相對盡一觴北
風飛黃葉遊子懷高堂我去先生留萬里遙相望臨岐
效愚忠宦途少康莊先生雖健飯鬢髮頗已蒼王事屈
瓜期珍重謀歸裝我身輕於鳥長空恣翱翔貧賤無星
碗計程達故鄉

琅邪公座中作

時雨西南來毒暑去無跡悠然君子堂涼意生几席夏
簟拂琅玕花磁浮琥珀酒酣坐前榮稍見西山碧勞人

如夢遊重謁楊雄宅何當假一廛執經永朝夕

查聲山有湖口之行贈別二十韻

貧士如餓馬亞身就繫維誘之以芻秣遠近惟所之去
年槐花黃與子來京師盛氣不受命睥睨輕天池自謂
久沉鬱一奮理亦宜如何舉鐵網終失珊瑚枝騫騰彼
何人爾我眉仍低蒼蒼黃金臺兩度秋風吹痛飲燕市
酒浩歌不甯悲子年少於我壯齒亦過期子親髮尤白
遠遊胡不歸歸則無以養其故高堂知造物鍊志士迫
之以路岐鄱陽白浪間又逐賓鴻飛子才洵絕人揮灑
饒天機健筆走黑電匠心運坤錘賣之為活計東野何

臣瞿啟甲呈進

時肥嗟我久二毛文園病支離家山邈何處送子神仙
馳嗚呼筆耕者辛苦蓋如斯

送談震方宰沙河

栽培必因材造物決非妄材復何所因異同乃萬狀談
子甫弱冠干雲而直上嬉笑取科第無前惟所向不有
以格之此時久卿相天欲老其才十年置閒曠遂謂不
遇時慷慨話得喪問子年幾何三十方曰壯相逢燕市
中傾蓋出腑臟兩心無間然氣盛喜相抗狂和荆卿歌
痛醜黃公釀百罰不云苛高論忽而創三載黃金臺梁
園分絳帳一見豁旅愁盡意闢顛放今出宰百里西南

作保障沙河亘通衢河濶沙飛颺地磽民力疲飢烏引
其吭勉哉龐士元盤錯見哲匠嘗讀循吏傳瑣屑到醢
醬亦聞長者言寧卑慎勿亢卓魯皆書生古人不可讓
努力活蒼生報最慰吾望臨岐贈短章期子母相忘不
以頌以規吾言豈無當

醉中觀拂水巖瀑

錦峰勢開張中豁窪為澗澗衝當陡崖峭壁削南面雨
過天無風懸瀑垂匹練風從東西來左右互撇旋北水
直南風抵抗則飛濺水急風力微勒之不能轉風勁水
力弱噴激點四散風水雄相當兩大乃搏戰奔流怒而

臣瞿啟甲呈進

騰倒捲上天半竒觀宇內無罕得逢其便是以山中人
畜眼不多見予將有遠行同人出郊餞觴急醉發狂酒
助足力健踴躍登巉巖莫從亦莫諫疾走逾劍門竝立
空王殿雲推千里墨雨集萬條箭羣壑沸崩濤湏臾紅
日現恰遇敵水風呼號逞慄悍奮勇挽長河百丈凌空
灌天矯掛玉龍縱橫掣金電璀璨跳珠璣玲瓏舞雪霰
忽然映彤霞亂落桃花片萬態爭飛揚水盡風不倦快
哉今日遊心蕩昏眸眩弄巧迴狂瀾此亦風之變



臣瞿啟甲呈進

